



La laudatura Silvia Hofmann-Conrad (san.), l'onorada Margrit Sprecher ed Anna Alice Dazzi Gross, la presidenta dal cussegl da fundaziun Milly Enderlin. FOTO F. ANDRY

## Cur ch' il schurnalissem daventa litterar

Premi grischun da litteratura per Margrit Sprecher

■ (anr/fa) Il Premi grischun da litteratura dotà cun 10 000 francs vegn assegnà d'ina fundaziun da la Soroptimista Milly Enderlin. Il premi da quest onn ha survegnì la schurnalista ed autura Margrit Sprecher. Grond travasch mesemna saira en la biblioteca chantunala. Blera glied, tranter quella er la manadra da l'Uffizi da cultura chantunal Flavia Kippele, era vegnida a festivar la surdada dal Premi grischun da litteratura a Margrit Sprecher. «Il premi che vegn attribuì dapi il 1999 dal cussegl da fundaziun da la Soroptimista da Cuira Milly Enderlin survegn quest onn er ina vischina da Cuira», ha ditg Anna-Alice Dazzi Gross, la presidenta dal cussegl da fundaziun, «cun sias reportaschas, portraits ed er cudeschs è ella daventada enconuscha suror ils cunfins dal Grischun e da la Svizra.» La laudatio ha tegnì Silvia Hofmann-Conrad, manadra dal post da stab per l'egualità da schanzas e confundatura da l'Archiv da dunnas grischun.

### «Sunter la lectura in auter uman»

Per ella è Margrit Sprecher ina da las schurnalistas svizras las pli vitalas ed impurtantas. «Er, sche quai l'era vegnì scusgelià ha ella decis da daventar schurnalista», ha ditg Silvia Hofmann, «causa ses dun d'observar, sia intuiziun e la simpatia per ils umans, surtut però er sia bella lingua ha ella spert gi success en questa professiun.» Ils texts da Margrit Sprecher han a l'avis da la laudatura qualitads litteraras: «Sias reportaschas dattan invista en milieus nunenconuscents u gidan ad encler connexs pli complexs.» Ch'ins na mangla betg esser adina d'accord cun l'opiniun da l'autura, «causa ses med da raquintar e preschentar ils fatgs da maniera persvadenta èn ins suenter avair legi ses texts sco in auter uman». A l'avis da Silvia Hofmann è il premi in ple-doyer per lavur schurnalistica d'alta qualitat.

### «In circol sa serra puspè»

Ch'ella haja plaschair che sia lavur ve-

gnia resguardada sco degna da vegnir premiada, ha ditg Margrit Sprecher. Cun la surdada dal premi s'ha serrà puspè in circol: «Milly Enderlin è stada l'emprima schurnalista che jau hai empris a conuscher, ina dunna che aveva la professiun da mes siemis.» L'emprim artitgel che Milly Enderlin ha fatg scriver ella per il Freier Rhätier era in rapport davart l'exposiziun da dalias a Tumein. En redacziun han ins badà il potenzial schurnalistic ed ha dà ad ella l'incumbensa da commentar films. Er, sche sia emprima critica da film è vegnida scursanida ferma s'ha Margrit Sprecher betg laschà scuraschar e cuntinuà sia carriera sco schurnalista.

### Cun egliada independenta

Margrit Sprecher è creschida si a Cuira. Ella ha frequentà la scolaiziun d'interpreta ed ha studegià suenter a Minca ed a Vienna schurnalistica e ciencias dal teater. 15 onns ha ella lavurà tar la revista «Elle», suenter per il «Zürri Leu» e dal 1983 ha ella ha survegnì l'incumbensa da la «Weltwoche» da stgaffir il ressort «Leben heute». Dapi l'onn 1999 lavura ella sco schurnalista independenta e scriva reportaschas per diversas gasettas en Svizra ed a l'ester, tranter auter per la «NZZ», «Das Magazin» u la «GEO». Per sia lavur ha survegnì Margrit Sprecher plirs premis, p. ex. il Egon-Erwin-Kisch-Preis. Ella ha publictà er divers cudeschs, tranter auter «Ungebetene Besuche» (portraits e reportaschas), «Leben und Sterben im Todestrakt» e «Die Mitte des Volkes – Expeditionen ins Innere der SVP». Ella è coeditura da la revista «Schweizer Journalist».

### Per dretgs umans e posiziun da la dunna

Soroptimist International è cun 3154 clubs en 125 pajais e cun var 90 000 commembras la pli gronda organizaziun da servetsch internaziunala per dunnas activas en ina professiun. La finamira è da promover cun ses projects da servetsch ils dretgs umans e la posiziun da la dunna. L'uniun svizra cumiglia 56 clubs cun var 2000 commembras. In da quels è il Soroptimist Club Cuira. Quel sustegna actualmain sur-

tut dus projects: Dad ina vart s'engascha il club per dar a giuvenils che na chattan betg plazzas d'emprendissadi la pussaivladad da far praticums u schizunt in emprendissadi. Da l'autra vart ramassa il club danas per la renovaiziun dal provediment d'aua d'in ospital en l'Ucraina. Enpli sustegna il Club Cuira ultra dad instituziuns localas dapi bliers onns er ina chasa d'uffants en Armenia ed ina scola en Madagascar.